

<County: Yorkshire North Riding>

<Code: L0126>

<MS reference: Northallerton, North Yorkshire County Record Office, ZRL 1/20>

<Text: Commissioning agreement>

This endentour made atte Burgh the aghtende day of the Moneth of Aprill the yere of kenge herry ferth after the conquest of Jngland thrittenede be-twix dame katerine of Burgh somtyme the wife of John Burgh william of Burgh the sonne of the forsaide John and dame katerine of the ta partie And Richarde of Cracall mason on the tother partie bere³ witnes that the forsaide Richarde takes full <ill><1 word></ill> forto make the kirke of katrik newe als werkemanschippe and mason-crafte will And that the forsaide Richard sall fynde alle the laboreres and seruys pertenant to the kirke makynge~ And that the forsaide Richarde sall take downe and ridde of the stane-werke of the alde kirke of katrik after the tymber be tane downe And he sall cary and bere alle the stane-warke of the alde kirke to the place whare the newe kirke sall be made And also forsaide Richarde sall take the grounde and ridde the grounde whare the <ill><2 words></ill> sall be made And the forsaide Richarde sall gette or garre gette atte the quarell atte his awen coste alle the stuffe of the stane that misters more for the makynge of the kirk of katrik than that stuffe that is founne with-in the kirke yerde beforsaide And also the forsaide Richarde byndes hym be this endentour that he sall make the kirke and the quere of katrik newe als werkemanschippe and mason-craft will that is to say the quere salle be of lenght within with the thiknes of bath walles fifti fote And it sall of breede w^hin that is to say with-in the walles twa and twenty fote And the forsaide Richarde sall make a wyndowe in the gauill of fife lightes acordaunt to the hight of the kirke couenably made be werkemanschippe and mason-crafte And he sall make apon the cornere of the southe side of the same windowe a franche botras rising vnto the tabill y^t sall bere the aloring~ And he sall make a wyndowe of twa lightes atte the awter ende couenably made be werkemanschippe and mason-crafte And a botras risynge vnto the tabill als it is before saide And he sall make a wyndowe on the same side of twa lightes and a botras acordaunt thare-to on the same side And the forsaide Richarde sall make <ill><lost in crease, 78 words></ill> <?>tras that it will best be and a windowe of twa lightes anense the desks And on the cornere of the northest ende of the forsaide quere he sall make a franche botras acordaunt to the hight be-fore-saide And the forsaide Richarde sall putte oute tusses for the makynge of a Reuestery And he sall make a dore on the same side for a Reuestery and a botras acordaunt to the hight be-fore-saide And the forsaide Richarde sall sette a wyndowe of thre lightes anens the desks the whilke

stande<?> nowe in the olde quere on the southe side The hight of the walles of the quere
 be-fore-saide sall be abouen the grounde twenty fote with a-n+aluryng abowne that <lost,
 presumably is>
 to say with a course of aschelere and a course of creste And also the forsaide Richarde sall make
 with-in the quere a hegh awter ioynand on the wyndowe in the gauill with thre
 greses acordaunt thare to the laghest grese begynnynge atte the Reuestery dore with thre Prismatories
 couenably made be mason-crafte with-in the same quere And the forsaide
 <ill><3 words></ill> the body of the kirke acordaunt of widenes be-twene the pilers to the quere
 And the lenght of the body of the kirke sall be of thre score fote and tenne with the thikn<end lost>
 of the west walle And on aither side foure arches with twa eles acordaunt to the lenght of the body
 And aither ele sall be made of breede of elleuen fote with-in th<end lost>
 walle And the forsaide Richarde sall make a windowe in the southe ele that is to say in the este ende
 of thre lightes acordaunt to the hight of the ele with a franch<end lost>
 botras risand vnto the tabill couenably made be mason-crafte And a wyndowe of twa lightes atte the
 awter ende a-pon the southe side with a botras dyand vnder the <ill><1 word></ill>
 And then a wyndowe of twa lightes with a botras and a dore And also the forsaide Richarde sall
 make a windowe of twa lightes with a franche botras in the
 southewest cornere acordaunt to the botras be-fore-saide And he sall make a windowe of a light in
 the west ende of the same ele And the ele sall be alourde acordaunt to
 the quere with an awter and a lauatory acordaunt in the este ende And also the forsaide Richarde sall
 take the wyndowe that standes now in the north side of the ald<end lost>
 kirke and sette it in the este side of the norhe<sic> ele ouer the awter with a franche botras on the
 cornere dyand vnder the tabill And the forsaide Richarde sall make a wind<end lost>
 of twa lightes atte the awter ende with a franche botras atte the mydwarde of the elyng~ and a dore
 and a botras on the northwest cornere And also the forsaide Richa<end lost>
 sall make a windowe of a light in the west ende of the same ele and an awter in the same ele and a
 lauatory acordaunt thare-to . the ele alurde acordaunt t<end lost>
 the tother The heght of the walles of aither ele vnder the tabill abouen the grounde sall be made of
 sextene fote hight And the forsaide Richarde sall make the pilers
 with the arches and the clerestory of the hight of sax and twenty fote abouen erth vnder the tabill
 And also forsaide Richarde sall schote out tusses in the west
 ende for makynge of a stepill And also fosaide<sic> Richarde sall make tablyng of the endes of the
 forsaide kirke of katrik with seueronne tabill And also the forsaide
 Richarde bindes hym and his executours and+assingne³ be this endentour that the kirke of katrik
 beforsaide and neuende sall be made suficiauntly and acordaunt to th<end lost>
 couenaunte³ beforsaide fra the fest of seint John of Baptist next folowand after the makynge~ of thes
 endentours safande the aloryng~ . vnto the same Fest of
 seint John of Baptist be thre yere next folouande after that and fully fullfilled bot if sodayne were or
 pestilence make it the whilke may be resonabill excusac<end lost>

for the forsaide Richarde And forsaide dame katerine and william sall Cari alle the stane that misters
 ouer the stuffe more then is fon in the alde kirke and in
 the kirke-yerde atte thare awen coste And also the forsaide dame katerine and william sall finde lyme
 and sande and water and scaffaldyng~ and synetres
 be-houely to the same kirke atte thaire owen coste And when the kirke of katrik beforesaide is fully
 made and endid the forsaide dame katerine and william
 sall hafe alle the scaffaldyng and synetres vnto thaire owen vse Ande the forsaide dame katerine and
 william bindes thame be thes endentours thair
 executoures and assingnes for-to pay vnto the forsaide Richarde and his assingnes for the makyng~
 of the forsaide kirke of katrik newe als it is rehersed And
 befor saide with-in terme of thre yere eght score of markes And if the kirke be endid atte the terme
 be-fore-neuende the forsaide dame katerine and william
 sall gif vnto the forsaide Richarde tenne markes of mone and a gowne of william wering~ to his
 reward And also the forsaide Richarde byndes hym
 be this endentoure³ that the quere of the kirke of Catrik sall be made newe fra the Feste of seynt
 John of baptist next folowand after the makyng of
 thes endentoure³ vnto the same Fest of seynt John of baptist next folowand als be a yere And also
 the forsaide Richarde byndes hym be thes endentours
 that he sall make the aloryng of the kirke of katrik newe be tho . ^[Mysomer] ~~mighelmes~~ next folowand
 after the Fest of seynt John of baptist before-neuend that
 the forsaide kirke of katrik sall be fully made and endid And that alle thes couenauntes beforesaide³
 and neuende sall wele and trewly . be fullfyld
 and done that forsaide Richarde falles for-to do be any mason-crafte or any other thyng
 be-for-neuende . the forsaide Richarde byndes hym his
 heires and his executoure³ vnto the forsaide dame katerine and william thaire heires and thaire
 executoures in fourty ponde³ of gude
 and lawfull mone of Jngland And that alle the couenaunte³ beforesaide and neuende sall wele and
 trewly . ^[be] done and fullfilde of the forsaide dame kateryn and william behalfe that tham falles to do
 the forsaide dame
 katerine and william be halfe that tham falles forto do the forsaide dame katerine and william byndys
 thame thaire heires thaire executoures vnto
 <ill><2 words></ill> Richarde in fourty ponde³ of Mone be thes endentoures writyn atte Burgh the
 day and the yere beforesaide